

Melaka sasar 7.45 juta pelancong hingga 2023

Oleh Nazri Abu Bakar - Ogos 6, 2022 @ 6:45pm
bhnews@bh.com.my



Ketua Menteri Melaka, Datuk Seri Sulaiman Md Ali mengiringi Tun Mohd Ali melawat Galeri Warisan Kota Melaka di Jalan Kota, Banda Hilir. - Foto NSTP/NAZRI ABU BAKAR

MELAKA: Kerajaan Melaka mengunjurkan kedatangan 7.45 juta pelancong sehingga tahun depan, susulan pembukaan sempadan negara bermula 1 April lalu.

Ketua Menteri Melaka, Datuk Seri Sulaiman Md Ali, berkata ia selari dengan 'flagship' 'Melaka Negeri Pelancongan' dalam Pelan Strategik Melakaku Maju Jaya 2035, yang memberi penekanan untuk meningkatkan bilangan kehadiran pelancong sebanyak 10 peratus setiap tahun.

Beliau berkata, sasaran kehadiran pelancong yang ditetapkan dalam pelan strategik itu mungkin bertambah ekoran pembukaan sempadan selepas negara berdepan kesan pandemik COVID-19.

"Untuk tujuan itu, pendekatan menambah produk baharu berkonsepkan pelancongan digital dan ekopelancongan menjadi antara fokus utama kerajaan negeri dalam terus memperkasa sektor pelancongan di negeri ini.

"Kerajaan negeri juga sedia menambah jumlah penganjuran aktiviti pelancongan di negeri ini," katanya ketika berucap pada Majlis Perasmian Galeri Warisan Kota Melaka dan Pelancaran Buku Warisan Kebangsaan Orang Hidup (WAKOH), yang dirasmikan Yang di-Pertua Negeri, Tun Mohd Ali Mohd Rustam.

Hadir sama, Timbalan Menteri Pelancongan, Kesenian dan Kebudayaan, Datuk Seri Dr Santhara J P; EXCO Kanan Pelaburan, Perindustrian, Pembangunan Usahawan dan Koperasi negeri, Datuk Seri Ab Rauf Yusoh dan EXCO Pelancongan, Warisan dan Kebudayaan negeri, Datuk Muhammad Jailani Khamis. .

Mengulas lanjut, Sulaiman berkata, kerajaan negeri melalui agensi berkaitan juga akan terus menyokong dan bersama-sama menggerakkan Dasar Kebudayaan Negara (DAKEN) dan Dasar Pelancongan Negara 2020-2030.

Beliau berkata, Melaka kaya dengan sejarah dan budaya yang tidak ternilai sehingga mendapat pengiktirafan sebagai Tapak Warisan Dunia Pertubuhan Pendidikan, Saintifik dan Kebudayaan Pertubuhan Bangsa-Bangsa Bersatu (UNESCO) bersama dengan Georgetown, Pulau Pinang pada 2008.

Malah, katanya, kepelbagaian budaya Warisan Tidak Ketara seperti kebudayaan Baba Nyonya dan Chetty, meletakkan Melaka sebagai sebuah negeri yang amat unik.

Selain itu, Sulaiman berkata, Galeri Warisan Kota Melaka diharap menjadi tarikan lebih ramai pengunjung dari dalam dan luar negara untuk mengenali dengan lebih dekat sejarah kemasyhuran Negeri Melaka.

Galeri terbabit yang dibina pada zaman British asalnya berfungsi sebagai sekitar 1912.